



# MAJLIS BANDARAYA SEBERANG PERAI

## TEKS UCAPAN

YBHG. DATO' AZHAR BIN HAJI ARSHAD  
DATUK BANDAR SEBERANG PERAI

## SEMPENA

*SOFT LAUNCH KEMPEN PENANAMAN PLANTING HOURS OF  
SEBERANG PERAI*

## TARIKH / MASA / TEMPAT

**29 JULAI 2022 (JUMAAT)  
10.45 PAGI**

**DEWAN KENANGA  
MENARA BANDARAYA MBSP**

Bismillahir Rahmanir Rahim

Assalamu'alaikum Warahmatullahi Wabarakatuh,

Selamat Pagi dan Salam Sejahtera,

Marilah sama-sama kita merafakkan rasa syukur kita ke hadrat Ilahi kerana dengan limpah perkenannya kita dapat berkumpul dalam *Soft Launch* Kempen Penanaman *Planting Hours of Seberang Perai* di Dewan Kenanga, Menara Bandaraya MBSP.

Saya ingin merakamkan penghargaan dan mengucapkan terima kasih Ahli-Ahli Majlis MBSP; Tuan Setiausaha Bandaraya; Ketua-Ketua Jabatan MBSP; rakan-rakan media dan para hadirin sekalian kerana sudi melapangkan masa dan memeriahkan suasana bersama-sama bagi menjayakan Majlis ini. Saya juga rakamkan syabas dan tahniah kepada Jabatan Landskap MBSP selaku penganjur majlis kita pada pagi ini.

**Tuan-Tuan dan Puan-Puan yang dihormati sekalian,**

MBSP amat komited dalam merangka strategi ke arah mewujudkan sebuah bandar raya rendah karbon yang berdaya huni. Ini bertepatan

dengan hasrat Kerajaan Negeri Pulau Pinang untuk menjadi negeri hijau yang pertama di Malaysia dengan tumpuan kepada aspek pembangunan dan pencapaian kualiti hidup yang tinggi yang termaktub dalam Penang2030 “*A Family-Focused Green and Smart States That Inspires The Nation*” di bawah Tema D “*Invest in the Built Environment to Improve Resilience*”.

Sejak tahun 2008 sehingga Jun 2022, MBSP telah berjaya menanam sebanyak 102,531 pokok di seluruh Seberang Perai. Untuk menjayakan program penanaman pokok di Seberang Perai, MBSP telah melaksanakan beberapa program penanaman pokok secara besar-besaran.

- I. Program Penanaman Pokok Teduhan Sempena Hari Kemerdekaan pada 27 Ogos 2017, yang melibatkan penanaman 3,002 pokok teduhan jenis *Tecoma (Tabebuia sp.)* secara serentak di 13 lokasi di seluruh Seberang Perai
- II. Program Penanaman Pokok Teduhan dari Jenis *Xanthostemon chrysanthus* (Golden Penda) Sempena Sambutan Hari Kemerdekaan Ke-61 pada 7 September 2019 di mana sebanyak 5,100 pokok Golden Penda ditanam secara serentak di 44 lokasi kawasan lapang di Seberang Perai.

- III. Pada 13 Oktober 2018 pula sejumlah Pokok Berembang (*Sonneratia caseolaris*) di pinggir Sungai Kerian di Kampung Che Isa, Teluk Ipil, Seberang Perai Selatan.
- IV. Pada 6 Oktober 2019, sempena Pemasytuhan Majlis Bandaraya Seberang Perai, sebanyak 5,555 pokok daripada 10 spesies telah ditanam secara serentak di 40 lokasi di seluruh Seberang Perai.

MBSP memberi penekanan terhadap peranannya sebagai Pihak Berkuasa Tempatan dalam menyediakan ruang hijau dan selamat kepada penduduk dan masyarakat setempat dan mengekalkan udara yang bersih dan persekitaran yang sihat selaras dengan SDG 11: “*Make cities and human settlements inclusive, safe, resilient and sustainable*”; dan SDG 13: “*Take urgent action to combat climate change and its impact*”, dan sejajar dengan kempen Kerajaan Negeri iaitu Penang 2030 *A Family-Focused Green and Smart State that Inspires the Nation*,

Inisiatif menanam pokok adalah bertujuan untuk mengurangkan kesan cuaca panas dan kering yang sering melanda negara kita. Penanaman pokok adalah penting dalam mengimbangi pelepasan karbon melalui penghasilan oksigen yang akhirnya mengurangkan kesan gas rumah hijau. Pokok-pokok yang ditanam di bandar boleh menjadi penghias kawasan,

penghias bangunan, penghias pinggir jalan dan tidak kurang yang merujuknya sebagai penambah atau pemberi kesan kehijauan.

**Tuan-Tuan dan Puan-Puan yang dihormati sekalian,**

MBSP pada tahun ini bercadang untuk melaksanakan program penanaman pokok *#PlantingHoursOfSeberangPerai* sempena sambutan Hari Bandaraya 2022 yang bertujuan untuk meningkatkan kesedaran mengenai perubahan iklim dan kepentingan mengekalkan persekitaran sihat bagi generasi akan datang. Tarikh penyertaan program ini adalah dari 29 Julai 2022 sehingga 16 September 2022 dan MBSP menggalakkan penglibatan serta kerjasama pelbagai pihak meliputi semua komuniti di seluruh Seberang Perai.

Pelaksanaan kempen ini bertujuan untuk meningkatkan kesedaran semua pihak mengenai pentingnya kawasan litupan hijau untuk kesejahteraan dan kualiti hidup selain usaha untuk menambahbaik ekosistem dan biodiversiti. Kempen ini juga bertujuan memupuk semangat cintakan alam semula jadi melalui penanaman pelbagai jenis pokok kepada segenap lapisan masyarakat. Objektif pelaksanaan program ini adalah untuk mengekalkan kawasan hijau di seluruh Seberang Perai;

meningkatkan kesedaran terhadap kepentingan pokok serta memupuk semangat cintakan alam semula jadi; dan meningkatkan kesedaran semangat pengekalan kawasan hijau;

**Tuan-Tuan dan Puan-Puan yang dihormati sekalian,**

Program ini terbuka kepada seluruh warga Seberang Perai yang berumur 13 tahun ke atas dan beralamat di Seberang Perai. Penyertaan terbuka kepada individu dan berkumpulan. Lokasi penanaman pokok yang dibenarkan untuk ditanam adalah Lot Persendirian atau Tanah Persendirian, Kawasan Agensi-agensi Kerajaan seperti hospital, Kawasan Agensi-agensi Swasta, Institusi Pendidikan seperti Sekolah, Kolej, Politeknik, Universiti dan lain-lain yang premis.

Peserta-peserta perlu bergambar bersama pokok yang ditanam dan dimuatnaik di IG Persendiriran dengan *#PlantingHoursOfSeberangPerai* & *#SeberangPeraiCityCouncil*. Hadiah akan diberikan kepada fotografi yang paling kreatif.

**Tuan-Tuan dan Puan-Puan yang dihormati sekalian,**

Akhir kata, saya ingin merakamkan ucapan tahniah dan syabas kepada pihak penganjur dan semua pihak yang menjayakan program dan menjadikan kempen ini menjadi kenyataan. Ucapan terima kasih yang tidak terhingga juga diucapkan kepada tuan-tuan dan puan-puan yang hadir, di atas kesudian meluangkan masa menyertai program anjuran MBSP.

Saya dengan lafaz ***Bismillahirrahmanirrahim***, merasmikan *Soft Launch* Kempen Penanaman *Planting Hours of Seberang Perai*.

**Sekian, *Wabillahi Taufik Wal Hidayah,***

***Wassalamualaikum Warahmatullahi Wabarakatuh.***

**Terima Kasih.**